

韓凝

東方虬

馮萬石

蔣挺

沈伯儀

韋元旦

吳揚吾

陳子昂

李昭德

張齊賢

魏靖

竹居攷屢

全唐文

卷二百八之二十



1000  
1000

1000  
1000

1000  
1000



1000  
1000  
1000  
1000

欽定全唐文卷二百八目錄

韓凝

漢齊蓋廟碑

沈伯儀


郊丘明堂嚴配議

李昭德

請建皇嗣疏

東方虬

尺蠖賦



蚯蚓賦

蟾蜍賦

韋元旦

游神泉詩序

張齊賢

明堂告朔議

七廟議

馮萬石

對文詞雅麗策

對求賢策

對歷數策

對議邊塞事策

對不以采蘋爲節判

吳揚吾

明堂告朔議

魏靖

理冤濫疏

蔣挺

對增賞就賦判

臣等謹對

賦判

聖澤廣被

美善

惟不以采薪為道

惟新盡塞車泉

惟烈燬取

惟不贊東

欽定全唐文卷二百八

韓凝

凝昌黎人

漢齊蓋廟碑

天子建德因生賜姓胙之上而命氏從其諡以稱族自義

軒法天泊我唐垂拱取威定霸宏弼皇維者卽錫姓封樹

公之先伯益典司三禮尚父封公營邱助化唐虞扶傾周

漢爵窮五等榮冠百工雖繁華族莫居其右公諱蓋字副

世前漢平帝錫字漢賢公生爲人瑞歿爲人神神而靈應

代崇明祀考史冊薨位之歲闕書徵譜謀降神之年無錄  
原其圖籍建號取公之錫字而名漢賢神矣十一代祖周  
諡康公因避田和篡亂爰宅於茲會祖節皇懷州刺史祖  
賀皇左司郎中考智皇成帝博士公五百年膺期挺生漢  
代神識沈敏凜肅丰姿經濟之略夙富於襟懷翊贊之源  
久明於微旨節用於內樹德於外關一時無與京伐未萌  
之謀世何能敵繇是平帝聞之深嘉其器累徵釋褐拜宣  
議郎大明爲臣之節素抱匡時之術肅治明法敬天畏人  
耿介對問有任座直言諫諍犯顏同朱雲折檻帝念公之



爲臣乃社稷之臣也乃錫之字時元始季年蕃戎猾夏帝  
知公神武名略又拜北平將軍受律邁征爲民舒福五申  
誓衆定見無窮之勲三略訓兵決逞必然之捷桴鼓作氣  
果應神機大潰羣兇振旅而返獻俘受馘帝輸鴈塞之憂  
命爵庸勲公拜鳳池之詔除幽州刺史卽下簡肅御衆詳  
明清聲獨彰飽聞天聽遷冀州刺史用革舊規維揚新令  
間執私黨斥遠姦回大副宸衷殊褒丕績封險瀆侯累承  
渙汗倍戒驕淫絕盤遊之娛除罩弋之物化源旣厚錫命  
愈深又封關內侯兼知河北道事兩綰郡符救早有隨車

之雨二垂侯印臨邊無擊柝之聲任彌重轉勤位踰高尤  
謹居祿以德不其然乎詩云樂只君子邦家之光公之謂  
矣時屬漢之季世臣莽巨君逆天肆兇踐極公銜哀之次  
憤氣填胸按劍呼天曰我先帝朝夕思治寤寐求賢子惠  
困窮民服厥命任我事効我功與惡而棄好非謀去順而  
效逆速禍天監孔明敢臣僞主迺於幽冀中分以濟水之  
南深溝峻壘繕甲兵具車乘戈矛林植雉堞雲平一方民  
飲公之惠愛尚公之忠節罔不祇若時僞主令大將  
郁帥兵討攘公獨步戎場卓然雄略不恃其險而以德

進戰虎賁爭先退守金湯莫固大挫勅敵不尅而還公純  
臣純孝冠絕古今神勞遠謀思復漢業大勲未集公薨於  
位冀趙之民號泣如堵耕夫釋耒若子產之喪鄭邦童子  
不謠類五穀之亾秦國會漢室復興追諡公號禮也有子  
五人咸名掩前哲克纘鴻業章帝拜孟子爲郎中仲子左  
翊衛大將軍至和順二帝徵命諸子建爵榮位易曰天之  
所助者順也人之所助者信也公之一門克彰二美順契  
天道信感人心美哉輪奐清廟

闕

二

儼然如

闕

一

二子侍

坐奉冢祀焉趨詣者鱗集皆股栗懾威祈禱者雲臻俱心

肅生敬列國之君粲盛闕一替民有災而恩靈必贊歲若

旱而雲雨時興德著四維福流千古以爾靈感定霸於茲

不文於石奚彰厥美

沈伯儀

伯儀吳興人武后時為太子右諭德歷官祭酒修文館學

士

郊丘明堂嚴配議

謹按禮有虞氏禘黃帝而郊嚳祖顓頊而宗堯夏后氏亦  
禘黃帝而郊鯀祖顓頊而宗禹殷人禘嚳而郊冥祖契而

宗湯周人禘嚳而郊稷祖文王而宗武王鄭元注云禘郊祖宗謂祭祀以配食也禘謂祭昊天於圓丘祭上帝於南郊曰郊祭五帝五神於明堂曰祖宗伏尋嚴配之文於此最爲詳備虞夏則退顓頊而郊嚳殷人則舍契而郊冥去取旣差前後乖次得禮之序莫尚於周禘嚳郊稷不間於二主明堂宗祀始兼於兩配咸以文王武王父子殊別文王爲父上主五帝武王對父下配五神孝經曰嚴父莫大於配天則周公其人也昔者周公郊祀文王於明堂以配上帝不言嚴父武王以配天則武王雖在明堂理未齊於

配祭既稱宗祀義獨主於尊嚴雖同兩祭終爲一主故孝  
經緯曰后稷爲天地主文王爲五帝宗也必若一神兩祭  
便則五祭十祠薦獻頻繁禮虧於數此則神無二主之道  
禮宗一配之義竊尋貞觀永徽共遵專配顯慶之後始創  
兼尊必以順古而行實謂從周爲美高祖神堯皇帝請配  
圓丘方澤太宗文武聖皇帝請配南郊北郊高宗天皇大  
帝德邁九皇功開萬寓制禮作樂浩禪升中率土共休普  
人同賴竊維莫大之孝理當總配五天謹議

李昭德

昭德司刑太常伯乾裕子擢明經累官御史中丞如意元年拜鳳閣侍郎同鳳閣鸞臺平章事以怙權貶欽州南賓尉召授監察御史來俊臣誣以謀逆誅神龍二年贈御史大夫建中三年加贈司空

請建皇嗣疏

臣聞文武之道布在方策豈有已爲天子而爲姑立廟乎以親親言之則天皇是陛下夫也皇嗣是陛下子也陛下正合得天子子孫爲萬代計况陛下承天皇顧託而有天下若立承嗣臣恐天皇不血食矣

東方虬

虬武后朝官左史

尺蠖賦

六氣氤氳四時平分天道恍忽是生萬物化而爲鳥兮有  
鳴鳳之來儀化而爲蟲兮有尺蠖之能屈原夫蠖之爲生  
也不飲不食非榮非利無欲進道處身似智幸稟天地之  
生亦承雲雨之施哂搏擊而爭疾輕爪牙而自致其勇也  
不怯雷霆之聲其慎也寧勞鷹隼之鷙浩然無悶之境獨  
處不爭之地多其順時而出就暖而長吐微絲以逍遙感



緩步而來往常靜泉澄遇躁風興屈伸進退翼翼繩繩同  
吹萬而生養體抱一以含宏聖人書之以作誠君子行之  
而足徵况不才之下士敢求伸以自矜

蚯蚓賦

惟陰陽之播氣實萬類以呈形有微蟲之稟質應甲子而  
濕生雨欲垂而乃見暑既至而先鳴乍逶迤而鱗屈或宛  
轉而蛇行內乏筋骨外無手足任性行止物擊便曲徒進  
退而皓首竟不知其所欲東西詰屈南北夤緣上食塵塊  
下飲淵泉應軒轅土德之王入蔡邕勸學之篇其體甚微

金定全唐文 卷二百八  
其用至專瑾泥塗以自保觸鹽滋而罔全豈造化之賦命  
信歸之於自然

蟾蜍賦

觀夫天地之道轉萬物以自然鱗蟲之聚有蟾蜍而可稱  
焉鳥吾知其擇木魚吾知其在水此皆嬰刀俎以生患而  
我沈冥而得全爾其文章睨目銳頭蟠腹本無牙齒之用  
寧懼鷹鷂之逐或處於泉或漸於陸常不離乎跬步亦何  
擇於栖宿當夫流潦初溢陰霖未晴乘清秋之良夜散響  
耳之繁聲頌洞雷殷混萬籟而爲一喧虺鼓怒怛異類以

那驚既莫知其所止故乃逢時則鳴觀其忘機似智稱善  
不伐進而無愧恥魚之曝鰓退亦能謀笑龜之灼骨方將  
樂彼泥中與井底安能出乎河長與海闊稱其異則畫地  
成川語其神則登天入月豈真窪坳之內而見其浮沒意  
茲蟾蜍匪陋攸居沼沚之毛恣涵泳之無斲蘋蘩之菜兼  
糗糧而有餘方其鳴孔公若聞於鼓吹當其怒越子反駐  
乎乘輿彼龍蛇之蟄也吾不知其所如

韋元旦

元旦京兆萬年人擢進士第補東阿尉遷左臺監察御史

與張易之有姻屬易之敗貶感義尉召爲主客員外郎遷  
中書舍人景龍二年爲修文館學士

游神泉詩序

美原縣東北隅神泉者雖無樹石森深之致而有豁險清  
泠之異韋子蓋嘗倦簿領泆塵冥爰命丞太原王公主簿  
平陽賈公尉南陽張公釋事以遊焉喟然而歎曰陵谷之  
變雖窮造化之功何檢有窮則適變無檢則忘功所以物  
効其奇事冥其契嗟虐浪不得列之玉檻漱以瓊漿勝負  
無私流俗所忿徒觀其色潔其味美起自文明首秋時則

垂拱元夏墮祥應運非醴泉歟不然何明析雜闕一字降福

肸鬩而幽通之若此也澗形如規四望若掃平地可深百

許尺東西延袤七八十尺下積員泉闕一字淳鏡澈莫測其

底南流出界雖雲漢昭回而滲漉無端則所謂上善利物

谷神不死豈虬龍窟宅靈僊福祐懷清佇俊抱逸尋幽者

乎躋顥氣而瑩襟情疏元流而屏喧濁忘歸淡定盍賦詩

云

張齊賢

齊賢陝州人聖歷初為太常奉禮郎遷博士論禮制合古

議累遷諫議大夫

明堂告朔議

禮官狀云經史正文無天子每月告朔之事者謹按穀梁傳曰閏月天子不告朔是知他月天子告朔矣又按左氏傳以魯侯不告朔為棄時政也則諸侯閏月亦告朔矣又按周禮太史職頒告朔於邦國之中禮記玉藻天子聽朔於南門之外皆有閏月王居門之事是天子亦以閏月告朔矣非是天子不告而諸侯亦告也穀梁子去聖尚近雖閏月告朔之義與左氏不同然皆以天子諸侯每月當行

告朔之事兩禮之設其文甚著不可謂經史無正文也又  
禮官狀以周禮天官太宰職云正月之吉始和布治於邦  
國都鄙乃縣象法於象魏使萬人觀之浹日而斂之卽是  
謂禮記玉藻之聽朔因此遂謂王者唯以歲首元旦一告  
朔此說非也何者太宰所云布治於邦國都鄙者布其所  
掌太宰之典也故地官司徒職則布教典春官宗伯職則  
布禮典夏官司馬職則布政典秋官司寇職則布刑典唯  
冬官司空職以五官之職言之則其職亦當布事典也  
此乃六官各以正月之吉宣布其職之典非告朔也干寶

之注以經所云正月之吉者卽是正月之朔日也故解云吉是朔日也今云告朔日者卽傳寫之誤不可據以爲說也又禮官狀云每月告朔者諸侯之禮故云左氏傳云旣視朔遂登觀臺今王者行之非所聞也又云以天子之尊而用諸侯之禮非所謂頒告朔令諸侯使奉而行之謂此大謬也何者左氏所言視朔者猶玉藻之聽朔也今禮官據左氏有魯侯行視朔之禮卽謂諸侯每月當告朔玉藻亦有天子行聽朔之禮亦有閏月王居門之事卽天子唯歲首一告朔何其一取而一捨也又孝經云昔者明王事



父孝故事天明又云明王以孝理天下豈有王者設教使  
諸侯尊祖告朔而天子不告也非所謂以明事神訓人事  
君之義又禮官狀云鄭所謂告其時帝者卽太皞等五人  
帝此又非也何者鄭注惟言告其時帝及其神以配文王  
武王不指言天帝人帝但天帝人帝並配五方時帝之言  
包天人矣但以文王武王作配則是並告天帝人帝諸侯  
受朔於天子故但於祖廟告而受行之天子受朔於上天  
理宜於明堂告其時之天帝人帝而配以祖考也故玉藻  
疏載賀瑒義亦以時帝爲靈威仰等五天帝且聖人爲能

饗帝孝子爲能饗親今若但告人帝則聖人之道未備非所謂能饗也又禮官狀云若天子每月朔旦告祭然後頒之則諸侯安得受而藏之告而行之是明太宰以歲首宣布一歲之令太史從而頒之令旣頒矣政旣行矣而王猶月月告朔復欲何所宣布者春官太史職云頒朔於邦國是總頒一歲之朔於天下諸侯故諸侯得受而藏之告而行之而王猶月月告朔頒之於官府都鄙也此謂畿內彼謂畿外事不相關也又禮官狀云漢魏至今莫之用者秦人滅學經典不存漢祖馬上得之未能備禮自魏以下喪

亂宏多豈可以漢魏廢禮欲使朝廷法之也又禮官狀云  
禮論等及祠令並無天子每月告朔之禮崔靈恩三禮義  
宗廟祭服義亦載天子視朔之服不可言無也又貞觀顯  
慶禮及祠令非徒無天子每月告朔之文亦無天子歲首  
告朔之事今禮官何以言天子歲首一告朔乎借矛擊楯  
昭然易了每月告朔在禮不疑尊祖配天於義爲得若乃  
創制垂統損益舊章或欲每月聽政或欲孟月視朔此則  
斷在宸極事關執政固非羣議所得參詳謹議

七廟議

昔孫卿子云有天下者事七代有一國者事五代則天子  
七廟古今達禮故尚書稱七代之廟可以觀德祭法稱王  
立七廟一壇二墀王制云天子七廟三昭三穆與太祖之  
廟而七莫不尊始封之君謂之太祖太祖之廟百代不遷  
禘祭之禮毀廟之主陳於太祖未毀廟之主皆升合食於  
太祖之廟太祖東向昭南向穆北向太祖者商之元王周  
之后稷是也太祖之外更無始祖但商自元王已後十有  
四代至湯而有天下周自后稷已後十有七代至武而有  
天下其間代數稍遠遷廟親廟皆出太祖之後故合食有

序尊卑不差其後漢高受命無始封祖卽以高皇帝爲太祖太上皇之父立廟享祀不在昭穆合食之列爲尊於太祖故也魏武創業文帝受命亦卽以武帝爲太祖其高皇太皇處士君等並爲屬尊不在昭穆合食之列晉宣創業武帝受命亦卽以宣帝爲太祖其征西豫章潁川京兆府君等亦爲屬尊不在昭穆合食之列歷茲已降至於有隋宗廟之制斯禮不易故宇文氏以文皇帝爲太祖隋室以武元皇帝爲太祖國家誕受天命累聖重光景皇帝始封唐公實爲太祖中間歷數旣近列在三昭三穆之內故皇

家太廟唯有六室其宏農府君宣光二帝尊於太廟親近則遷不在昭穆合食之數今皇極再造孝思匪寧奉二月二十九日勅七室已下依舊號尊崇又奉三月一日勅既立七廟須尊崇始祖速令詳定者伏尋禮經始祖卽是太祖太祖之外更無始祖周朝太祖之外以周文王爲始祖不合禮經或有引白虎通義云后稷爲始祖文王爲太祖武王爲太宗乃鄭元注詩雍序云太祖謂文王以爲說者其義不然何者彼以禮王者祖有功而宗有德周人祖父王而宗武王故謂文王爲太祖爾非祫祭羣主合食之太

祖今之議者或有欲立涼武昭王爲始祖斯爲不可何者  
昔在商周稷卨始封湯武受命湯武之興祚繇稷卨故以  
稷卨爲太祖卽皇家之景皇帝是也涼武昭王勲業未廣  
後主失國守土不傳景皇始封實基明命今乃捨封唐之  
盛烈崇西涼之遠構考之前古實乖典禮魏氏不以曹參  
爲太祖晉氏不以殷王卬爲太祖宋氏不以楚元王爲太  
祖齊梁不以蕭何爲太祖陳隋不以胡公楊震爲太祖則  
皇家安可以涼武昭王爲太祖乎漢之東京太議郊祀多  
以周郊后稷漢當郊堯制下公卿議者僉同帝亦然之唯

杜林正議獨以爲周室之興祚繇后稷漢室特起功不緣堯祖宗故事所宜因循竟從林議又傳云欲知天上事問長人以其近之武德貞觀之時主聖臣賢其去涼武昭王蓋亦近於今矣當時不立者必不可立故也今旣年代浸遠方復立之是非三祖二宗之意也實恐景皇失職而震怒武昭虛位而不答非社稷之福也宗廟事重禘祫禮崇先王以之觀德或者不知其說旣灌而往孔子不欲觀之今朝命惟新宜應慎重祭如神在理不可誣請勅加太廟爲七室享宣皇以備七代其始祖不合別有尊崇之議謹



議

馮萬石

萬石聖歷初第進士大足初中嫉惡科神龍初中才高位  
下科景雲中中懷能抱器科開元初重考及第六年中超  
羣拔類科十三年考判入第十六年又入第二十六年中  
文詞壯麗科凡九登科選

對文詞雅麗策

問朕聞至道雖微不言而化皇天陰隲相叶其彛信寒暑  
而生成施雲雨而沐潤垂範作訓樹君育人時有澆淳教

垂繁略成湯既聖禹道云亾桑扈谷風屢動詩人之刺塞  
 門反玷時貽宣父之嫌我國家振彼頽綱開茲盛業朕以  
 不德襲號乘時而皇極之道未敷謨明之軌尚闕思宏厥  
 理其義安從至如視聽貌言恒若時若會極歸極作哲作  
 又一一以貫之何方而可夫禮以飾情情疏則禮略樂以通  
 感感至則神和理內為同修外為異同異之用有味其功  
 人俗未融佇明斯要又四時武德制自何君五行文始本  
 之誰代昭德盛德莫辨所尊昭容禮容未詳所出悉情以  
 對用釋余疑

對臣嘗黽勉讀書夙夜匪懈觀前代之事稽王者之風欲  
樹文明必招俊乂所以平章百姓昭暢萬人負黼衣而海  
宇清垂衣裳而天下理今陛下朝盈多士野無遺賢猶復  
發德音下明制張雲羅以掩俊設天網以頓奇片善不遺  
有能皆進故得飛飛丹鳳棲翼於帝梧皎皎白駒連食於  
塲藿縱夷齊巢許咸屈於茲臣旣庸妄豈敢當此且聲非  
入異譽不出凡文律未明才用無取謬參推擇濫赴搜揚  
安敢避直飾詞向華乖實但丹誠有厲至敬無文敢竭鄙  
聞用當明試然將涓滴以足海用纖埃以增岳雖寡攸助

誰能默哉臣聞建國興邦必以黎元爲本康時訓代必以  
政術爲先軌謨雖異理化皆一昔者太上之君崇道以致  
化立德以養物人必欲壽敦禮教而不傷人必欲富薄賦  
斂而不困人必欲逸則省力而不勞人不欲危卽扶持而  
使固不强人之所惡不禁人之所欲故能無爲而理不言  
而化及至中古行仁履義克己厲身拯溺於人博施於物  
卽能陰陽不錯風雨以時疾疫必除殄孽莫起洎乎末代  
政令不作刑法聿修奢侈是崇禮樂非雅時無美善之說  
俗有姦邪之釁豈不由君失其道臣非其人澆薄浸興淳

朴離散者也。今陛下出號施令，罔有不常，齊物正人，各得其所。然猶綜覈古今，稽謀政教，視先王之得失，崇今日之高明。以此天聰尚云不德，巍巍至化，謙尊而光，非臣愚昧所能涯際。制策曰：皇極之道未敷，謨明之軌尚闕。思宏厥理，其義安從者？臣以爲皇極將立，莫先擇俊得人。則政和非人，則政失人。賢化遠，豈不謬哉？至如因能任官，量賢受祿，卽百僚濟濟，萬姓安安，去無用之言，除無用之器，卽情實斯得，謬說不繁。使人以時謹身節用，卽倉廩儲積，黎庶完豐。進有德而退無良，卽庶位允釐，庶官不曠，尊有功之

子棄無功之人卽營事者不惜其身制作者能竭其力罰  
必當罪及姦回自除賞必中賢則人臣自勸夫如是則海  
內行大中之道天下有幸甚之言何憂夫皇極之道未敷  
者也若乃列張輔佐建立官司詢忠直之言開進諫之路  
用能獻可替否補過弼違外藏主之非內正君之失今陛  
下乃順時而動非道不行事無不嘉人欲何說故獻納之  
職諫諍之詞但可略言莫知所議大哉至德實冠古今且  
朝無妄臣縱朱雲重生安得折檻人不妄從雖辛毗不死  
曷聞牽裾天子甚明是故羣臣無事亦何憂文軌之闕哉

制策曰視聽貌言恒若時若會極歸極作哲作又一以貫之何方而可者臣聞王者法乾理物觀象裁規敬順天時恭行月令恒若時若罔有咎徵矣尊九疇之儀修八政之規事不失儀動不違制出處語默皆歸於仁依乎中庸遠棄偏黨垂至道於萬國寄良政於百官直道而行不可則止會極歸極作哲作又不日而致矣視聽貌言無從而失也制策曰禮以飾情情疏則禮略樂以通感感至則神和理內爲同修外爲異同異之用有味其功人俗未融佇明期要者臣聞化難將美人各有心不違制節必有放縱故

先王作典禮以防之興雅樂以感之用能移風易俗安上  
理人矣今陛下行宗廟之禮故能配天地之神履直言之  
議故能立上下之敬聽宮商之變故能分善惡之俗捐鄭  
衛之音奏簫韶之樂正疏略之弊敦揖讓之儀州郡大行  
朝廷式序同異斯達內外罔差既合盡美之端何問不才  
之子若罄愚而說則陛下無有味之咨若駐筆而述則陛  
下鍾佇明之訪實迷誨遊何足知之臣聞大樂與天地同  
和大禮與天地同節既列同異之因將分內外之殊皇王  
是尊古今所重俱爲時用其功一焉制策曰四時武德制



自何君五行文始本之誰代者臣聞四時武德制之以周  
主五行文始本之於漢帝制策曰昭德武德莫辨所尊昭  
容禮容未詳所出者臣聞昭德武德實有攸尊之道昭容  
禮容出於劉氏之代昔者魯哀公問儒行宣尼有更僕之  
勞孔父訪烏官邾子生傾蓋之倦然宜富學滄海猶黽勉  
於一隅况乎道謝桂林豈對揚於庶事徒周遊於文苑終  
展轉於迷津謹對

對求賢策

問選賢舉能秀造參用今之所薦誠爲得人未聞舍聲待

扣乃有不耕而獲十室忠信理亦難誣若遂踐於清朝仗  
何材而濟物又二老歸周見稱何德八元佐舜見述何功  
滋泉以何術見稱莘邑以何辭作相

對昔者聖人之立極也選衆舉能列官分職以通天地之  
德以類亭毒之功臣哉鄰哉時用遠矣主上重光纘曜紹  
開中興拜輶軒於受命之初希俊賢於御極之首茲乃羲  
軒之志堯禹之心勤求道要實所望清光哉故鄧林有必  
至之材崑山亦無藏價之寶可不謂然乎臣以妄庸藝無  
兼採謬從卑列應此嘉薦誠非鉛朽所能塞充然天休震

動虛求秀逸揚於王庭亦僂俛矣顧當參明試獻嘉謀竭  
謏聞敷大體言用身退以酬萬一豈所謂不耕而獲邀名  
幸時而已哉今見屬有司恭承下問懋陳常務自謂無奇  
若得飾躬召見對揚天休下學上達舒情竭憤則亦引諭  
陰陽較明時政之要咸激枉直甄撫授受之宜効其涓埃  
以增海岳耳若遂踐清朝濟時成務其道甚大惟變所適  
俾聞後命則藏器而動顧以更僕亦何盡言曲學鯁生居  
今志古若乃終爲令德功實佐時披卷懷人恨爲異代雖  
慚非博物敢不揚言則夫西伯善養夷齊以讓國歸老帝

舜舉能元凱以通才受職惟師尚父韜鈴乃適道之功相  
時阿衡鼎餼獻爲君之術雲臺紀績吳鄧懿其元勲麟閣  
圖功衛霍流其茂實謹對

對歷數策

問元龜效祉鼎命昭夏王之祚赤烏呈祥金德總商君之  
業白魚躍而周道隆丹雀來而秦德霸殷因夏禮損益可  
知秦盛周衰天人何昧若水滅火起殷周之運匪人若桀  
暴紂昏廢興之期自我然而龍鬪興於夏日鼉祆發於周  
年災祥兆於前成荒敗形於後政蕩蕩之德何所加焉佇

爾揚名爲余張目

劉永谷詩

對臣聞天地草昧洪鈞列五運之期雲雷始屯大德分一  
人之位莫不時來命偶人迪天將白環昭虞后之功元珪  
錫夏王之德空桑負鼎遇爲牲之君渭水張羅得非熊之  
相伏惟陛下化光坤載道叶乾行總五氣以發生籠百王  
而亭育粵若稽古推歷數之存亾感而遂通酌天人之符  
命明揚側陋典採芻詞開闡大猷旁求雅問則天文幽遠  
誠匪管窺然人事昭彰敢陳壅塞原夫興亾有數符命無  
差遽啓丹書俄迴白璧君臣道合則遐邇乂安上下情乖

則邦家板蕩水火革而天人順暴虐行而桀紂亾百六爲  
霖旱之災七九非湯堯之運歷數斯在惟德動天禍福無  
門惟人所召故德者五行之義也人者兩儀之心也人心  
動而悔恡生德義形而陰陽謝必乘金運則殷不及於期  
果歷木行則周不及於數龍鬪黿祆之發人與事并白魚  
丹雀之符德將時應神道設教金土之運匪他人文化成  
狂聖之來是我蕩蕩之德何敢不通翼翼之心奚施不可  
天也人也坦然克分時乎命乎昭文斯辨臣優柔埋道杳  
同河漢或躍文江懼深冰谷謹對

對議邊塞事策

問東胡逆命北海爲墟朝廷循修復之功邊境乏折衝之  
寄遼水東西城池不復丸山左右職貢猶迷其使三聖遺  
黎九州故地飄然零落可不痛哉今欲示以威惠申誘約  
東選衆之舉未覩於今出羣之略何必是古指明其要無  
大簡焉

對古之王者仁覆萬類不以中外爲隔而以兼濟爲心固  
能出門同人遠近感應含生受氣靡不從助焉蠢彼林胡  
阻分遼漢挺而走險代構其患昔我大唐之創業也東舉

日域北暨幽陵不毛之類僉率貢職頃邊吏不謹憊我王  
度夷戎怙亂遂荒塞垣致乃虔劉朔邊騷驚河冀天地悔  
禍人亦有心懷我舊章自相魚肉遊魂待命爲日久矣光  
天纂曜景號昭升萬靈與能兩儀交際蠢彼醜裔何獨非  
人但未諭堯心自疑其譴累息跼蹐猶昧占風且舜自側  
微舞干而有苗卽敘湯亦小惠褰羅而異方懷柔今若一  
選王人以備行李諭茲天造慰彼遺黎則兼程驟步不日  
而至北極夷障無限於幽荒東絕扶桑盡同於封內何止  
兵不血刃野無勞師復遼水之城池循丸山之琛賚而已



若乃選衆舉能之術五材三略之奇亦鏘鏘廟堂濟濟朝  
序人誰不職知臣在君何待庸言而後行是義皇之代戰  
征不興文景之時韓彭勿用雖欲自效亦無所施謹對

對不以采蘋爲節判

甲會射制氏不以采蘋爲節取由加罪訴稱非

三命已上

三皇威察利用弧矢六藝和容率由飲射故澤宮相圃揆  
尊卑之節出正中質定賢愚之分旣參之以樂章必備之  
以禮物甲利乃習妙言會其儀豈徒主皮之善將勤君子

之爭制氏頗曉鏗鏘班乎樂職屬斯登降須徇疇人寧宜  
翼簏不修鐘鼓靡奏闕於所守罪亦何疑至如武侯熊侯  
自天子而斯達采蘋采蘩由命士而有差理合各附等威  
咸依節制訴非三命已覺游詞將扣兩端須知甲品請更  
閱實然後定刑

吳揚吾

揚吾聖歷初成均博士

明堂告朔議

臣等謹按周禮禮記及三傳皆有天子告朔之禮夫天子

頒告朔於諸侯秦政焚滅詩書由是告朔禮廢今明堂肇  
建總章新立紹百王之絕軌樹萬代之鴻規上以嚴配祖  
宗下以敬授時令使人知禮樂道適中和災害不生禍亂  
不作今若因循頒朔每月依行禮貴隨時事須沿革望依  
王方慶議用四時孟月日及季夏於明堂修復告朔之禮  
以頒天下其帝及神亦請依方慶用鄭元義告五時帝於  
明堂則嚴配之道通於神明至孝之德光於四海

魏靖

靖武后朝監察御史

理冤濫疏

臣聞古之綱紀在乎降殺理道攸寄人命所懸法務於寬  
刑期尚簡猶慮詆欺過制旋濫不歸臣遠睇前經歷探故  
事刑得其中則風雨順而陰陽和法失其宜則怨濫興而  
災眚作虐臣酷吏者資矯佞以事君行刻薄以臨下矯佞  
似乎用意刻薄類乎無私侮憲害公弄權撓法倚深之奏  
似公之請旣肆淫巧理難聽察其周興來俊臣邱勣萬國  
俊王宏義侯思止郭宏霸李敬仁彭先覺王德壽張知默  
者旣堯年四凶矣恣愚騁暴縱虐含毒讐疾在位安忍朝

臣罪逐法加刑隨意改當其時也囹圄如市朝廷以目既而神靈不昧冤魂有託行惡期報禍淫可徵具嚴天刑以懲亂首臣竊見來俊臣身處極法者以其羅織良善屠陷忠良籍沒以勸將來顯戮以謝天下臣又聞之道路上至聖主傍洎貴臣明明有羅織事矣俊臣旣死推者獲功胡元禮超遷裴談顯授中外稱慶朝廷載安破其黨者旣能賞不逾時被其陷者豈可銜冤累歲且稱反之徒須得反狀惟據口辨卽請行刑拷楚妄加疑答何限故徐有功以寬平見忌斛瑟羅以妓女而受拘中外具知枉直斯在借

以爲喻其餘可詳臣又聞之郭宏霸自刺而唱快萬國俊  
被遮而遽亾霍獻可臨終膝拳於項李敬仁將死舌至於  
臍皆衆鬼滿庭羣妖橫道近集若響隨聲備在人謠不爲  
虛說伯有晝見殆無以過此亦羅織之一據也臣以至愚  
不識大體儻使平反者數人衆共詳覆來俊臣等所推大  
獄庶鄧艾獲申於今日孝婦不濫於昔時恩渙一流天下  
幸甚

蔣挺

挺義興人武后朝官殿中侍御史內供奉歷湖延二州刺

史

對增貲就賦判

劉乙爲邑道百姓增貲就賦減年從役

皇明撫運萬寓欽承墨綬爲邦四人從化雖輯寧之道自我國章而惠養之規亦憑良宰劉乙懷符宓賤比績劉平增貲減年誠一時之異政以今方古亦千載而同風撫狀雖欲驚款論情翻可嘉尚請從薦舉用表賢能

華俗驚荒倫計福可嘉尚爾餘薰與風素賀道

曾費為平始一制之真以今古衣于嫌而回風懸

好國章而惠養之賦衣懸身宰隆之鄭奇效類其

皇即燕製萬壽始承墨幾為雅四入跡以輿轉寧之

幸甚 隆乙為色直百教曾賞絲類類平於

將提曾賞絲類

...



欽定全唐文卷二百九目錄

陳子昂

麈尾賦 并序

大周受命頌

上大周受命頌表

爲豐國夫人慶皇太子誕表

爲喬補闕慶武成殿表

爲程處弼慶拜洛表

爲朝官及岳牧賀慈竹再生表

為建安王賀破賊表

奏白鼠表

為陳御史上奉和秋景觀競渡詩表

為建安王獻食表

為河內王等論軍功表

為喬補論突厥表

刺子扇

大宋全惠文卷二百六目錄

欽定全唐文卷二百九

陳子昂

子昂字伯玉梓州射洪人文明初舉進士詣闕上書武后  
奇其才擢麟臺正字再轉右拾遺聖歷初以父老解官歸  
侍縣令段簡覬其富因事繫獄憂憤卒年四十三

麈尾賦

并序

甲子歲天子在洛陽時余始解褐與祕書省正字太子司  
直宗秦客置酒於金谷亭大集賓客酒酣共賦座上食物  
命余爲麈尾賦焉

天之浩浩兮物亦云云性命變化兮如絲之棼或以神好  
正直天蓋默默或以道惡强梁天亦茫茫此仙都之靈獸  
固何負而罹殃始居幽山之藪食乎豐草之鄉不害物以  
利已不營利以同方何忘情以委代而任性之不忘卒罹  
網以見逼愛庖丁而惟傷豈不以斯尾之有用而殺身於  
此堂爲君雕俎之羞厠君金盤之實承主人之嘉慶對象  
筵與寶瑟雖信美於茲辰詎同歡於疇昔客有感之而歎  
曰命不可忍神亦難測吉凶悔吝未始有極借如天道之  
用莫神於龍受戮爲醢不知其凶王者之瑞莫聖於麟遇

害於野不知其仁神既不能自智聖亦不能自知况林棲  
而谷走及山鹿與野麋古人有言天地之心其間無巧冥  
之則順動之則天諒物情之不異又何有於猜矯故曰天  
之神明與物推移不爲事先動而輒隨是以至人無已聖  
人不知子欲全身而遠害曾是浩然而順斯

大周受命頌

臣聞大人升階神物紹至必有非人力所能存者上招飛  
鳥下動泉魚古之元皇祇承上帝所以協人祉匹天休卓  
哉神明昭格上下莫不以之矣是故物有可則而道有可

宗謂之文獻其原上也緬哉有唐欽崇天命三祖繼統品  
物咸章元厯改元黃瑞告神皇出地軸陟天階厯軒轅登  
太昊集乎初始之極以授我皇符鳥之肇開辟元口女希  
氏姓神功大哉莫不盛於茲日矣乃察璿璣稽寶元元  
識升紫圖則天粲然皇文炳也非夫昇光之曜魄寶之精  
其孰能威神皇赫赫若斯者哉是時三階底平百揆時序  
天下昌矣元功溥矣西土耆老欣然來稱曰至哉天子恤  
我元元勤勞下都升聞上帝臣聞天無二日土無二王皇  
帝嗣武以主七鬯豈不宜乎神皇睿然乃登崑崙之臺修

三統觀五始探命歷之紀則知元氣之所造也方採鍾龍  
象鳴鳳協林黃之律以因生賜姓九月戊申朔八日乙卯  
神都耆老遐荒夷貊緇衣黃冠等萬有二千餘人雲趨詣  
闕請曰臣等聞王者受命必有錫氏軒轅皇帝二十五子  
班爲十二姓高陽氏才子二八命爲十六族書云祇台德  
先不拒朕行然則聖人起則命歷昌必有錫氏之規臣等  
伏惟陛下受天之符爲人聖母皇帝仁孝肅恭神明可以  
纂武承家以克永代陛下崇錫類垂憲章不易日月天人  
交際斯亦萬代之一時臣等固陋不達大道敢冒死上聞

神皇穆然方御珍圖謙而未許也越翌日丙辰文武百寮  
又與耆老夷貊道俗等五萬餘人守闕固請曰蓋臣聞聖  
人則天以王順人以昌今天命陛下以主人以陛下爲母  
天之丕律元命也人之大猷定姓也陛下不應天不順人  
獨高謙讓之道無所憲法臣等何所仰則敬冒昧萬死固  
請是時闕一字踵昆吾有鳳鳥從南方來歷端門羣鳥數千  
蔽之又有赤雀數百從東方來羣飛映雲迴翔紫闥或止  
庭樹有黃雀從之者又有慶雲休光半天傾都畢見羣臣  
咸覩於是衆眦雲萃囂聲雷動慶天應之如響驚象物其



猶神咸曰大哉非至德孰能覩此昔唐虞之瑞逃聽矣今則見也天物來聖人革時哉况鳳者陽鳥赤雀火精黃雀從之者土也土則火之子子隨母所以纂母姓天意如彼人誠如此陛下曷可辭之昔金天鳳凰鎬京黃鳥赤氏朱鴈有吳丹鳥皆紀之金冊藏之瑞府以有事也陛下若遂辭之是推天而絕人將何以訓於是皇霈然曰俞哉此亦天授也乃命有司正皇典恢帝綱建大周之統厯革舊唐之遺號在宥天下咸與惟新賜皇帝姓曰武氏命為嗣皇崇乎紹天統物其赫胥大庭之上事已乃獻頌曰

天命神鳳降祚我周彩容有穆其儀孔休惟我有周實保  
天德上帝臨命纂承皇極人曰天祐有皇女希造天立極  
緬然猷徽赫我皇帝乃先厥微匪天之命鳳鳥誰歸因生  
錫氏革號循機豈不順乎天而應乎人帝曰俞哉

上大周受命頌表

臣子昂言臣聞昔周道昌而頌聲作遂能昭配天地光烈  
祖宗垂之無窮永為代典伏惟神聖皇帝陛下闡元極昇  
紫圖光有唐基以啓周室不改舊物天下惟新皇王以來  
未嘗覩也臣聞仲尼曰聖人邱不得而見之矣又曰舜禹

之有天下邱不豫也又曰鳳鳥不至河不出圖邱已矣夫  
皆傷不得見大道之行而鬱悒也臣草野愚陋生長休明  
親逢聖人又覩昌運舜禹之政河洛之圖悉皆目見幸亦  
多矣今者鳳鳥來赤雀至慶雲見休氣昇大周受命之珍  
符也不稽元命探祕文採風謠運象物紀天人之會以協  
頌聲則臣下之過也有國彛典其闕乎臣不揣樸固輒  
獻神鳳頌四章以言大周受命之事誠未足以潤色鴻業  
揄揚盛美亦小臣區區丹慊之至謹輒詣洛城南門奉進  
塵冒旒冕伏表慚惶

爲豐國夫人慶皇太子誕表

臣妾某言今日日伏承軒宮載誕皇嗣克昌品物咸歡天人交慶臣妾聞聖人多子祝美於堯年螽羽宜孫稱道乎周頌自非璿圖配永寶祚靈長何以茂對天休光紹大業伏惟皇太后陛下星虹授祉月夢延禎餘慶集於天孫榮光流於帝子玉衣方泰瑤渚增輝其竊寵中姻承恩外戚塗山之慶旣裕於夏臺高禡之祠未陪於殷薦竊以潢汙之品可享王庭元秬之微有芳天獻豈圖美於豐侈信有厚於由衷敢用擬議蘋蘩精誠菽藿洗心而薦竊希瑤席

之珍潔意而羞以陪金鼎之實謹獻食若干與冒黷珍膳  
沾汙象筵追用慚惶伏表悚灼

爲喬補闕慶武成殿表

臣某言臣以今日奉勅於武成殿喚臣入問骨篤祿等  
賊請降事臣以愚瞽得踐赤墀對揚天休具奏其狀天恩  
特賜臣溫顏又降問云洛陽宮室皆隋朝營制歲月久遠  
方有隳頽樓閣內殿凋落者衆補一壞百無可施功唯此  
武成確然端立土木丹綵光色如新不知何故得自如此  
卿之博識應知其說臣當時造次略奏其梗概退而再省

未涉萬分臣恭惟聖言緬求神像研幾太極幽贊元符上以稽驗神謀旁以合契冥數信有至道允在於茲臣聞聖人有言曰清明在躬志氣如神嗜欲將至有開必先天降時雨山川出雲此蓋言神應必有其物陛下至尊至神爲天下主宰御羣品威統百靈宸居尊嚴品物昭泰自天而祐於是用寧抑臣又聞物之有靈如人之有神神之和暢則支體便利用人繁昌則物必豐茂所以見其俗知興廢之數覩其氣識盛衰之由服物猶然况其大者今陛下應天受命括地登樞先飛名於祕籙終據圖於寶座今則當

千載之運得三統之元帝氣氤氳祚基於  
命皇圖幽藹  
象顯於天成夫以德之休明尚榮草木化  
昭慶且變烟  
雲况皇皇真君龍居其極武成合慶土木增榮獨超衆殿  
夫何足怪臣聞敬其事者必載其文美其業者必頌其德  
臣所恨才非墨妙思乏筆精不能贊揚休祚歌詠聖德臣  
請以此事付之史臣千代知神萬載知述伏願天恩特垂  
降許

爲程處弼慶拜洛表

臣某言臣糞土殘魂合竄荒裔特蒙陛下施再生之德赦

萬死之誅起骨九泉同列編戶臣誠萬死無以上答况恩  
全賤命生在帝鄉伏見陛下至德配天化及草木天不愛  
寶洛出瑞圖地不藏珍河開祕籙陛下恭承天命因順子  
來建立明堂式尊顯號成之匪日功若有神萬國咸歡百  
靈同慶元正肇祚品物惟新陛下郊祭旻天總受羣瑞神  
靈慶戴萬福攸宜斯實曠古莫聞於今始見喙飛蠕動莫  
不歡心臣以糞土窮骸不合輒同朝賀以古來大禮莫盛  
於今昔登封泰山七十四主明堂布政無三數君誠以陛  
下道冠古今恩溢天地昆蟲草木猶或相歡况臣久蒙驅



策今日又拔死爲生溝壑殘骸而得再造遂得恭聞大禮  
側聽鴻名臣伏惟宇宙之中含氣之類蒙恩負德獨臣最  
甚向非陛下慈造曲被鴻私臣已灰滅遐荒肝塗邊壤豈  
得尚存骸骨恭聞聖慶臣所以匍匐冒死不避誅戮冀申  
螻蟻之情以同鷲雀之慶然臣自惟罪累不可比人在於  
禮經尤宜自絕所以屏營糞土不敢先聞今旣萬國禮終  
百神慶畢昆蟲鳥獸亦並歡寧故臣螻蟻之誠始敢冒死  
上賀臣伏知冒禮違法罪合誅夷臣生見明時豫聞嘉慶  
臣今卽殞滅實萬死爲榮不勝歡踴戴賀之誠

為朝官及岳牧賀慈竹再生表

臣等言臣聞天視自我人視天聽自我人聽故堯臣放命  
降震怒之災姬聖尊仁受昭事之福先王所以恭畏上下  
祇奉天人於是有昭德塞違懲惡勸善所以明枉直正典  
刑一昨伏奉恩勅宣示司農卿宗晉卿所奏日者王德壽  
等承使失旨虐濫無辜災感蝗蟲毒痛慈竹寧歲為之饑  
饉畝亦以之流離冤魄冥呻元感上惻乃降明制發德音  
恤淫刑蠲虐典於是幽魂雪憤遺噍昭蘇枯竹由其再生  
蝗蟲為之輟膏

一作隕跡

詳蠻動色瘴瀉收氛當天札之凶年

致昇平之稔歲非夫聖靈昭感天人合符何吉凶之徵報  
同影響天下幸甚臣等聞聖人法天所以順物小人違道  
則必亂常故虞稱欽明嚴四凶之罪魯有仁義正兩觀之

誅所以邦家用昌苛慝不作王某等色厲內荏心僻行堅

弄措

一作指

刑之文爲商夷之法以訟受服同惡自尤竟招

殛竄之辜允肅政刑之序今日蒼鷹斂翼乳虎含牙朝廷

無腹誹之憂天下有刑措之頌信可以懲殘創酷誘善旌

寬永清侮弄之階共登仁壽之域臣等謬贊臺閣忝守藩

維實思仰奉大猷以穆中典幸屬至聖崇德小人勿用凡

在庶品實百恒歡雖成康頌聲文景默化刑清政肅曾何  
足云伏乞書之國經頒示天下使四方風動萬國歸仁垂  
範後昆以爲炯戒無任慶抃之至

爲建安王賀破賊表

臣某言今日日得遼東都督高仇須等月日破逆賊契丹  
孫萬斬等一十一陣露布并捉得生口一百人送至軍前  
事三軍慶快不勝踴躍臣聞天之所棄雖暴必亾人之共  
讐在遠彌戮况凶羯遺醜未及犬羊固作孽以招誅自辜  
恩而取滅伏惟陛下威加四海子育百蠻鬼神尚不敢違

凶狡豈能逃罪逆賊萬斬等天奪其魄生自爲殃仇須等  
謹奉廟謀遠憑國計短兵纔接羣逆銷亾返風迴烟薰睛  
掩目此乃天威潛運神道密周豈止人謀抑由靈助今盡  
滅殃病孽固折服飢災兼至凋弊日滋未加天兵應自糜  
爛臣訓勵士馬今日剋行大軍一臨凶寇必殄獻俘在卽  
拜闕有期預喜承恩思勝慶賀無任抃快之至

奏白鼠表

臣某言今日日臣等令中道前軍總管王孝傑進軍平州  
十九日行次漁陽界晝有白鼠入營孝傑捕得籠送者身

如白雪目似黃金頓首跼伏帖若無氣將士同見皆謂賊  
降之徵臣聞鼠者坎精孽胡之象穿竊爲盜凶賊之徒固  
合穴處野居宵行晝伏今日歸命素質伏辜天亾之徵  
兆實先露自孝傑發後再有賊中信來不謀同詞皆云盡  
滅病死親離衆潰匪朝卽夕臣訓兵勵勇取亂侮亾昔宋  
剋鮮卑蒼鷲入幕今聖威遠振白鼠投營休兆同符實如  
靈契凡在將士孰不歡欣執馘獻俘期在不遠

爲陳御史上奉和秋景觀競渡詩表

臣某言伏見某月日御製秋景務餘聊觀競渡故陳先作

式佇來篇凡六韻天文爰降品彙咸亨金簡潛開瑞回斯  
見臣聞白雲興詠漢遊汾水之祠黃竹申歌周舞瑤之  
駕然而志崇遠轍事或勞人故文思之化未光太注道  
猶闕伏惟聖母神皇陛下太虹齊聖感月含神元德茂於  
皇階文明照於天下用能提玉斗挹璿衡百神景從三靈  
協贊青雲出洛爰開受命之符赤甲滎河終御興王之寶  
非窮神之至德者其孰能與於是哉既而黃屋務閑紫機  
時暇洞庭張樂思接軫於軒遊媯水披圖想同驂於堯輦  
然而遠而勞物者未若近而安人動而勤已者豈比靜而

泰神於是從金蹕鳴玉鸞清禁林御池殿肅波神一作而

戒事命舟子為水嬉彩鷁蓮歌乍起江吳一作吳江之引青龍

桂檝時搖甌越一作時之風鳥逝虬驚沸珠潭而競逐雲

飛電集橫玉浦而流光信可以娛樂惟靈發揮文物皇歡

允洽白日俄光於是奏薰風於管絃詠叢雲於林籞帝歌

爰作天藻攸彰黼帳帷宮縟文房之綉綵祥雲瑞景霏翰

苑之榮一作蹟信探道一作蹟於元包得斯文於紫極太平允矣

元首康哉方欲朝明堂之宮輯羣后之瑞尊崇顯號光啓

聖圖封玉嵩邱以接千年之統泥金少室攸增萬歲之規



卓哉煌煌聖君之表也微臣曲學蓬戶竊位蘭臺未聞馳  
馬之謠非有雕龍之思鞠躬霜署謬覩於天章逖聽鈞臺  
側聞於帝樂天文尊貴一作貴不遠於下臣帝寶珍崇曲宣  
於近貴竊以君唱臣和固不隔於尊卑宮變商從方允諧  
於金石輒用齋心扣寂假翰求詞將以攀日月之末光繼  
螢爝之微照不勝云云

爲建安王獻食表

臣謬藉葭莩叨榮圭組元戎出塞違鳳宸而逾年班師入  
朝拜鸞闈而有日策勛飲至頻承湛露之恩獻壽奉觴未

申行潦之薦所以白茅微藉願享於鈞臺黃污菲誠思奉  
於瑤水謹輒獻食一百饗伏知金雞瑞鼎盈上帝之珍羞  
玉女行廚盡羣仙之品味以茲菲薄有類蘋蘩多慚在藻  
之歡竊有獻芹之志斤願皇慈俯納丹慊獲申天子萬年  
永慶南山之壽微臣百拜長承北極之恩無任誠懇之至  
爲河內王等論軍功表

右金吾衛大將軍兼檢校洛州長史河內郡王臣懿宗加  
爵一等勳五轉司賓卿兼羽林大將軍建安郡王攸宜加  
爵一等勳七轉臣某等言伏奉月日制書錄臣等在軍微

功特加前件勳封嘉命聿至寵渥載優伏對慚魂殞首顛  
越云云臣聞古者名將先士卒而後身故其功勸末世庸  
將窮人力以寵已故其政乖然則簞膠投河三軍告醉刑  
印在手萬夫以離夫與衆共功專已獨利成敗之理與亾  
繼焉賞者國之大事故不可忽日者林胡構孽敢亂燕陲  
陛下徵義兵誅不道天下士庶焱集星馳皆忘身憂國紆  
禍卻難至於躬先矢石血塗草莽冒艱險歷寒溫氣騰青  
雲精貫白日誠亦勤矣雖聖靈威武逆虜自滅然士卒戮  
力亦盡其勞今大功未酬衆議猶在而臣等駑怯猥加先

封臣等不能折衝虜廷還師衽席今坐加茅土之賜以先將士之勤使鶡冠虎臣將何以勸今戰士留滯於外府軍吏咨嗟於下寮臣等胡顏敢冒天造夫賞一勸百猶恐未孚利一沮萬其弊誰救爵命不可以招謗國章不可以假人伏願天光俯回昭發軍禮請以臣等前件勛封迴受戰亾人及立功將士等上以明國之大賞下以雪臣等謬功使人悅怠勞士感知死然後兵可訓勵賊可誅屠此誠國之元經不可苟而利者臣等不勝區區

爲喬補闕論突厥表

臣某言臣以專蒙叨幸近侍陛下不以臣不肖特勅臣攝  
侍御史監護燕然西軍臣自違闕庭歷涉秋夏徒居邊徼  
無尺寸之功臣誠暗劣孤負聖明然臣久在邊隅夙夜勤  
灼莫不以蕃事爲念俾按察之比以突厥離亂事跡參驗  
委曲窮問往來竊有以得其真莫不自爲鯨鯢遞相吞食  
流離殘餓莫知所歸臣誠愚不識事機然竊以往古之變  
考驗於今乃知天亾凶醜之時陛下收功之日然臣聞之  
難得易失者昔也易遇難見者機也聖人所貴者去禍於  
未萌今陛下體上聖之資開太平之化匈奴爲中國之患

自上代所苦久矣合天降其災以授陛下萬代之業在于  
今時臣請以秦漢以來事跡證明之伏願陛下少留聖聽  
尋繹省察天下幸甚臣聞始皇之時併吞六國制有天下  
按劔叱咤八荒犇馳然匈奴彊梁威不能服牧馬河內以  
侵邊疆始皇赫然使蒙恬將四十萬衆北築長城因以逐  
胡取其河南之地七百餘里當時燕齊海岱羸糧給費徭  
役煩苦人以不堪故長城未畢而閭左之戍已爲其患二  
世而亾莫不始於事胡也至漢興高祖受命率羣雄乘利  
便以三十萬衆窘迫白登七日被圍僅而獲免自是歷呂

太后至孝文帝單于桀驚益凌漢家文帝徒以遜詞致獻  
金帛但求其善和而已不敢有圖賈誼所以哭之痛文帝  
以天下之盛而卑事戎狄以倒懸天下也至景帝時邊受  
其患於是漢武踐祚以承六代鴻業屬乎文景元默之化  
海內又安太倉之粟紅腐而不可食內庫之錢貫朽而不  
可校財力雄富士馬精彊忿匈奴之驕慢將報先帝之辱  
遂使王恢韓安國將三十萬衆以馬邑誘單于師出徒費  
竟無毫髮之功於是大命六師專以伐胡爲務首尾二十  
餘年中國騷然大受其弊至於國用不足軍興不給租及

六畜算及船車盜賊羣興京師起亂竟不能制單于之命  
一日而臣服之漢宗衰殘幾至覆社稷也故漢武晚年厭  
兵革之弊乃下哀痛之詔罷輪臺之遊封丞相爲富民侯  
將以蘇中國也至宣帝代罕復出師屬匈奴數窮天降其  
禍虛閭權渠單于病死右賢王屠耆堂代立骨肉大臣自  
不相服又立虛閭權渠子爲呼韓邪單于擊殺屠耆堂諸  
名王貴人各自分立爲五單于更相攻擊以至大亂殘虐  
死者計萬億數畜產耗減十至八九人以飢餓相燔燒以  
食於是寄命無所諸名王貴人右伊秩訾且渠當戶以



下將兵五萬稽首來降於北方晏然靡有兵革之事直至  
哀平之際邊人以安臣竊以此觀匈奴之形察天時之變  
盛衰存亡之機事可見也然則匈奴不滅中國未可安臥  
亦明矣夫以漢祖之略武帝之雄謀臣勇將勢盛雷電窮  
兵黷武傾天下以事之終不能屈一王服一國宣帝承衰  
竭之後撫瘡痍之人不敢惕然有出師之意然而未有遺  
矢之費而臣僕於單于之長者其故何哉蓋盛衰有時理  
亂有數故曰聖人修備以待時是以正天下如拾遺陛下  
肅恭神明德動天地今上帝降匈奴之災孽遺陛下之良

時不以此時順天誅建大業使良時一過匈奴復興則萬代爲患雖後悔之亦不及矣古語曰天與不取反受其咎今天意厚矣陛下豈可違之哉臣比在同城接居延海西逼近河南口其磧北突厥來入者莫不一一臣所委察比者歸化首尾相仍攜幼扶老已過數萬然而瘡痍羸憊皆無人色飢餓道死頗亦相繼先九姓中遭大旱經今三年矣埜皆赤地少有生草以此羊馬死耗十至七八今所來者皆亦稍能勝致始得度磧磧路旣長又無好水草羊馬因此重以死盡矣不掘野鼠食草根或自相食以活喉命

臣具委細問其磧北事皆異口同辭又耆老云自有九姓  
來未曾見此飢餓之甚今者同羅僕固都督早已伏誅爲  
亂之元其自喪滅其餘外小醜徒侵暴自賊耳本無遠圖  
多獵葛復自相讐人被塗炭逆順相半莫知所安回鶻諸  
部落又與金州橫相屠戮羣生無主號訴嗷嗷臣所以願  
陛下建大策行遠圖大定北戎不勞陛下指揮之間事業  
可則千載之後邊鄙無虞中國之人得安枕而臥豈不  
在陛下斷哉且匈奴爲中國患非獨秦漢之間臣竊惟先  
聖時衛公李靖蓋中國之一老臣徒藉先帝之威用妙勝

之策當頡利可汗全盛之日因機逐便大破虜庭遂繫其  
侯王裂其郡縣六十年將於今矣使中國晏然斥堠不警  
書之唐史傳之無窮至今天下謂之爲神况陛下統先帝  
之業履至尊之位醜虜狂悖大亂邊陲皇天遺陛下以鴻  
基之時陛下又得復先帝之跡德之大者其何以加若失  
此機事已過往使李靖豎子獨成千載之名臣愚竊爲陛  
下不取也伏見去月日勅令同城權置安北都護府以招  
納凶叛振匈奴之喉臣伏慶陛下見幾於萬里之外得制  
匈奴之上策臣聞隗囂言漢光武見事於萬里之外制敵

應變未嘗有遺今陛下超然神鑒遠照實所謂聖明之見  
覩於無形也臣比住同城周觀其地利又博問諳知山川  
者莫不悉備其地東西及北皆是大磧磧並石鹵水草不  
生突厥嘗所大入道莫過同城今居延海澤接張掖河中  
間堪營田處數百千頃水草畜牧供巨萬人又甘肅諸屯  
犬牙相接見所聚粟麥積數十萬田因水利種無不收運  
到同城甚省功費又居延河海多有魚鹽此所謂強兵用  
武之國也陛下若調選天下精兵采拔名將任以同城都  
護臣愚料之不用三萬陛下大業不出數年可坐而取成

臣比來看國家興兵但循於常軌主將不選士卒不練徒如驅市人以戰耳故臨陣對寇未嘗不先自潰散遂使夷狄乘利輕於國威兵愈出而事愈屈蓋是國家自過計於敵爾故非小醜能有異圖臣竊以爲陛下今日不更爲之圖以激勵天下忠勇但欲以今日之兵今日之將冀收功於異域建業於中興則臣之愚蒙必以爲未可得也陛下卽以突厥爲萬代之患則臣所言願加察若以夷狄荒服不臣小人非所敢諫臣今監領後軍某等取某月卽渡磧去計至某日及劉敬同謹當請按行磧計至此已來地形

及突厥滅亾之勢當審虛實續以奏聞伏願陛下省臣此  
章爲國大計儻萬有可一中者請與三事大夫熟圖議之  
此亦萬伏一時也伏願少留聖意閑暇念之天下幸甚陛  
下採臣芻蕘臣請執殳先驅爲士卒啓行橫行匈奴之庭  
歸報陛下臣死之日庶無遺恨不勝云云

魏晉魏不昌之曰無世外不類云云

不斜眉慈美再痛碎受共魏士卒皆令射并世以之類

此在萬外一神少丹隱之留聖靈則魏之天下皆無道

意為國大其黨其存同一中各謂典三尊大夫燕國歸之

又突氣激古之楚曾審密貴歸以表問水則則丁合目以



欽定全唐文卷二百十目錄

陳子昂 二

爲人陳情表

爲程處弼辭放流表

爲將軍程處弼謝放流表

爲赤縣父老勸封禪表

爲永昌父老勸追尊中山王表

爲人請子弟出家表

爲義興公求拜掃表

爲義興公陳請終喪第二表

爲義興公陳請終喪第三表

爲副大總管屯營大將軍蘇宏暉謝表

爲副大總管蘇將軍謝罪表

謝衣表

謝賜冬衣表

爲建安王謝借馬表

謝藥表

爲宗舍人謝書表

初七謝恩表

遷祔謝恩表

爲僧謝講表

謝免罪表

爲張著作謝父官表

爲王美暢謝兄官表

爲武奉御謝官表

爲百官謝追尊魏國大王表

爲司農李卿讓本官表

金定全序文 卷一百一  
三  
爲陳舍人讓官表

爲司刑袁卿讓官表

爲資州鄭使君讓官表

爲金吾將軍陳令英請免官表

欽定全唐文卷二百十

陳子昂

爲人陳情表

臣門衰祚薄少遭險豐行年三歲嚴父早亡慈母鞠育哀  
惇相養臣又疴羸少多疾病零丁孤苦僅得成人老母憫  
臣孤蒙恐不負荷教誨師氏訓以義方家貧無資紡績以  
給束修衣褐並出母指臣既無姊妹寡有兄弟衡門獨立  
唯形與影母子相視惇惇靡依罹此艱虞歷二十歲臣稍  
以成立忝迹朝班薄祿微資始期色養私情獲遂母子相

歡殃罰不圖老母見背攀號何及泣血漣沔於時日月非  
宜權殯京兆歲序遷速於今集年臣本貫河東墳隧無改  
先人邱壟桑梓猶存母亾客居未歸舊土宿草成列拱樹  
荒涼興言感傷增以崩咽今卜居宅兆將入舊塋明年吉  
辰最是良便除此之際未有剋期臣謬齒王人職在驅役  
今歲奉使已至居延單行虜庭絕漠千里臣雖萬死無答  
鴻恩恐先朝露有負眷知一作老母伏惟陛下仁隱自天孝思  
在物哀臣孤苦降鑒幽冥使臣來年得營葬具斬草舊域  
合骨先墳保送羈魂獲申子道烏鳥之志獲遂私情遷寢

事畢馳影奔赴雖卽殞歿甘心無憾

爲程處弼辭放流表

糞土臣某言臣以殃釁姪構凶逆臣合宗族誅戮以顯國  
刑不謂天慈哀矜宥從寬典全臣骸骨生竄遐荒窮魂再  
造以崩以躍 謝臣聞忠臣事君如子事父窮痛之至則  
呼所親何者右父恩深臣子懇切况臣蒙陛下恩遇如子  
於母今爲子不孝爲臣不忠長辭闕庭永沒荒裔悲窮痛  
恨荼毒誰依卽使朽骨埋魂長滅泉壤懇誠莫展幽翳明  
恩實恐隱匿於君不盡臣節明神誅殛瞑目貽殃輒敢隳

裂肝心罄竭誠懇殘喘冒死期以少謝伏惟聖母神皇陛下哀憐垂察中謝臣聞犬馬賤畜尚知主恩草木無心猶感德化臣雖駑猥不足比人負榮懷恩能無感激臣山東孤賤朝無親故性識愚鈍材無可堪非能矯跡立方飾行軌物假借名譽爲時吹嘘遂得宿衛階墀忝職郎將勤勞莫紀尸素已多任經十有三年竟無一階升錄臣之駑劣於此可見而貪冒榮寵尚不知歸陛下應天受圖恢纂大業又不以臣駑鈍特見哀昇擢任中郎委以心膂在職未幾卽檢校將軍纔逾一年又加正授未盈三歲貴顯朝端



寵渥隆崇莫與臣比每刻肌骨曉夜思維臣以何功謬私  
天造超羣越輩顯赫明朝應由天性專愚志一守直行不  
負物心不愧神盡忠事君竭力養母所以聖慈幽鑒曲照  
懇誠寵任無疑委同親近不然愚臣何以叨此殊恩臣凶  
險罪深母不終養爰初遘疾以至終亾天慈再三降鑒賜  
藥酒脯珍膳繼踵臣門優問殷勤若同親戚臣之母子何  
德於天子貴母榮恩禮重疊臣誠不孝至頑至嚚蒙此恩  
榮豈無感戴臣愚性爲善不願人知非敢自矜用爲僥倖  
皇天后土實見赤心臣往任郎將之日陛下特以臣貧賜

銀及綵臣以天恩非分矜憐賜臣懷戴之心祈懇冥報遂用於天宮寺寫書造像半爲聖人半爲老親臣以君親之恩所宜並報報是當理不合人知自爾造成一無知者臣今日獲罪不合上言實以事君之心所宜罄盡善惡有隱恐負赤誠恐臣長沒黃泉無見聖日區區之意安可不陳臣每以陛下恩深微臣命淺嘗願湮宗滅族獲報萬分何圖誠効未申凶孽先集逆天反道背德辜恩污辱門宗虧缺臣節此臣所以椎心泣血仰天號咷長負陛下之恩終無上報之日煩冤荼毒心肝以麋比者待罪幽囚以殞身

碎首爲奉陛下賜書示喻照察臣心所以捧戴偷生假恩  
殘喘今旣蒙寬法兄弟獲全投竄遐荒甘禦魑魅臣之慶  
賴復何可言所恨亾母弃背卽遭此禍几筵塗炭孤魂煢  
煢存者流離亾者哀痛辛酸幽顯爲世所悲應由臣不孝  
不忠延此禍酷何以面目下見先臣何以心顏拜辭天闕  
生死無措永訣於今卽以某月日部勒妻子奔波就道卽  
應死滅結草幽泉伏願聖母神皇陛下至尊寶神爲萬姓  
加膳天下禔福以祐蒼生壽若南山永永無極不勝戀慕  
感咽之至

金定台原之卷二百十  
四  
爲將軍程處弼謝放流表

臣某言臣無教訓家有逆子臣合汚宗滅族以顯國刑天  
慈哀矜放從流竄臣爲慶賴已是非圖今月遂蒙天恩以  
臣所坐流刑特從放釋窮骸枯骨一朝再生踴躍章惶再  
崩再殞中謝臣山東孤子朝無親故性識愚魯非有才能  
陛下超羣越輩崇以榮寵昔任郎將十有三年遂無涓塵  
一階昇錄自陛下踐極謬荷恩私冒寵叨榮超絕時輩從  
郎將檢校將軍纔逾一年卽加正授皆從宸眷非有因人  
寵渥隆崇莫與臣比臣之孤賤榮顯知慚臣又凶殃積罪

甘投魑魅孤負陛下之恩永爲遐荒之鬼肝腦塗地無以  
微酬豈謂天造曲矜恩及枯骨收骸溝壑返魄幽泉使魑  
魅窮魂重生聖日糞土殘命不滅荒陬荷德感恩萬死無  
報不勝感荷再生之慶

爲赤縣父老勸封禪表

臣聞帝功旣乂必昭告於上元元命攸尊必升封於厚載  
故七十二主能恢萬代之規三五六經以爲百王之典伏  
惟陛下應天受命握紀登樞包括乾坤之靈亭毒神明之  
化故能開天寶闡地珍溫洛所以升圖滎河由其薦籙羣

神既贊衆瑞交馳謳歌於是大歸禮樂以之咸備陛下仰

順天意允答神休垂顯號以居宸建明堂而治物百寮惟

允萬國咸寧然則嵩岳神宗望玉鑾而來禪天中仙族佇

金駕而崇封實大禮

一作德

之昌期膺告成之茂典况神都

爲八方之極太室居五嶽之尊陛下垂統紫微大昌黃運

報功崇德允協神心應天順人雅符靈望皇圖盛業實在

於茲臣等叨願堯封久忘帝力竊聞聖人封禪天下所以

會昌山岳成功皇壽由其配永臣等既爲陛下赤子陛下

又爲萬姓慈親實願上報天功下順人望勒成嵩嶽大顯

尊名不勝慶幸之至

爲永昌父老勸追尊中山王表

臣聞子貴親榮聖人典禮故姬文受命尊太王之名漢祖  
登宸加上皇之號而皆事美帝籍業盛昌圖臣伏見中山  
大王道合先天功成佐命昔高祖神堯皇帝義旗爰建大  
號初興首贊皇基定策京邑用能神驅電掃應天順人龍  
躍紫微光宅區夏實賴大王之德翼成高祖之勲開國成  
家猶未奉答况陛下應命受天協運披圖正顯位於明堂  
昭大明於天下功崇五帝業盛三皇可謂寶極洪名尊崇

光大今者追尊之義猶闕於顯陵榮親之典未聞於帝號  
臣聞商周革命封祀宋之君春秋正名美虞晉之祀夫以  
興王繼絕尚不闕於禮經况乎大孝尊親豈可虧於祀典  
臣等冷和白屋沐慶元門幸爲可封之人叨遇永昌之運  
伏見陛下則天法地崇孝臨人方且示天下以事親正皇  
猷以達禮蒼生之慶實賴惟新不任區區伏請上中山大  
王尊號遠以光祖宗之德下以順黎元之望

爲人請子弟出家表

臣某言臣以險覺私門不造亾父故某官先臣某早先朝



露永謝休明日月不居星紀云暮伏以先臣策名委質冠帶早始自解巾卽陪軒禁終於結綬累忝榮私三厯名卿職參於河海入居州牧任叨於股肱而報効未聞零落先及啓足之日露首之慚是以臣克奉詔言志期冥報請以當家子弟三兩人奉爲高宗大帝出家歸道而孤榮在疚遺屬未申奉以哀號實貫心髓今者大帝登仙之忌以及茲辰先臣懇誠未效他日所以乞遂冥願敢覬天恩庶菩提之因發揮於正覺涅槃之證幽贊於宸階先臣夙心無恨泉壤伏願上天降鑒微誠可哀因緣獲展存沒交慶

不勝崩迫云云

爲義興公求拜掃表

臣禍釁所鍾早日孤露墳塋莫掃松柏凋荒臣之不天實  
有由咎死罪死罪昔先臣下代遺訓未忘而殃罰不圖家  
禍潛構兄弟無故並爲參商中冓之言所不可道孤臣不  
孝萬死餘責死罪死罪然臣之負譴寧陷無辜吏議不明  
以投魑魅自泣血去國寄命南荒歷年被病再以生死炎  
山漲海氣瘴窮天戴白之老俗無聞者孤臣疲薶豈望須  
臾分誦委骨窮溟餌身魚鱉狼荒之鬼永悲長逝不意慶

雲垂澤天渙宏流拂拭霧露生見白日踴躍昭泰情何以  
勝死罪死罪而餘殃未泯凶故薦臻亾兄濟江合家淪溺  
嫂姪俱逝一不生存尋途未中臣妻又殞重疊亾沒契闊  
山川至止之日生意盡矣誓將守死陵墓歿齒家園不圖  
恩幸曲成寵章仍及題輿別駕職是恩州再造生涯天實  
爲德死罪死罪臣自歸日淺塋廟未修荆棘荒然祭祀無  
主今卽便祇皇命遠職邊夷歲月方賒拜掃何日瞻言出  
涕感貺崩摧伏惟陛下仁養羣生孝理天下萬物咸遂各  
得其宜臣獨向隅有以長戚伏願天慈愷悌憐憫孤窮寬

以簡書之刑賜其告歸之請使得駿奔西土長號北陵獲  
申存沒之悲生謁園塋之樹稽顙松關謝不睦之辜肉袒  
山門祈自新之路刻誓肌骨奉以周旋然後退死蠻夷沈  
骸糞土甘心朽滅庶無遺恨儻昊天鑒照孤誠可哀則臣  
之鰥生志畢今日不勝崩迫之至

為義興公陳請終喪第二表

草土臣某言去年某月日奉哀陳請乞終喪制今某月日  
奏事官賫臣所奏表迴伏讀報詔不勝悲懼陛下為臣累  
有政能特見任用使臣移孝為忠即斷來表臣內愧不孝

外慚無能污辱聖聰措身無地臣某中謝臣聞時方媮薄  
勸人以孝時方趨競勸人有禮有不至者誅而教之臣今  
不病固合辭避况臣疾發日久亾母未葬忍偷餘生望畢  
家事敢汙人倫以傷風俗昔山濤與時主有舊溫嶠亦功  
當代濤起應禮嶠不歸葬守禮法者議而薄之臣於國  
無濤嶠之功舊必依詔命兼濤嶠之可薄俛仰人間豈  
羞恥聖朝用法合置誅殛前者直省賫勅勒臣赴任使  
司準勅移責州所由官吏畏懼威嚴臣所經行停留不  
得待臣出界然後奏報臣氣力羸憊奔波道路悲憂惶恐

舊疾加極半身不遂手節拘急行步飲食須人扶助近又  
兩目昏暗如有瘴冒雖生猶死不堪力强特望聖慈乞臣  
骸骨歸奏几筵及葬州里在臣私情死生願足臣今病在  
桂州伏待命臣風昏謬妄舉動失常頻犯天威不勝震  
恐謹遣某官今表陳乞以聞

爲義興公陳請終喪第三表

草土臣某言臣先患風疹并兩目昏闇右手不能制物一  
足不自運動前後頻有表狀請停官職臣自到桂州病轉  
增劇更加瘴虐臥在床枕兩目漸不見物起動皆須扶引

死在朝夕敢偷祿位伏思陛下謂臣尚領禮放以疾  
遷延歲月待畢喪紀臣除官已來向欲一歲頻違詔命合  
正典刑階下縱不忍罪臣殘喘乞臣餘生固不可爲臣曠  
官待臣痛損特望天恩卽爲臣替不任荒懼哀懇之至

爲副大總管屯管大將軍蘇宏暉謝表

臣聞獫狁不恭周王致其大戮將軍失律漢將被其嚴刑  
未有逆命驕天而逋豐鼓之罰亾師沮衆遂寬載社之誅  
伏惟天冊金輪皇帝陛下肅恭上帝子育羣生萬國所以  
宅心百蠻由其屈膝而契丹凶狡敢竊陲邊毒虐生靈暴

珍天物皇兵順伐仗仁義以共行窮寇姦回憑險阻而猶  
鬪臣等仁虧聖略智昧詭圖遂以熊羆之師挫於犬羊之  
旅誠合結纓軍壘抵罪國章陛下以堯舜深仁且緩三苗  
之伐禹湯罪已不與萬方之辜遂得齒劍餘魂更參授鉞  
之任死綏之晚復同挾纊之恩四夷義以來蘇三軍感而  
抃舞瘡瘡再起俘馘是圖將士同心誓雪孟明之恥殤魂  
共憤思亢杜回之讐臣等殉義忘生報恩惟死不任感激  
慶戴

爲副大總管蘇將軍謝罪表



臣某言伏奉某月日已前赦書赦臣萬死纔削見任官秩  
還復本將軍名始慶再生卽榮寵命宛轉踴躍感戴慚惶  
中謝臣聞鑿門受律本合忘生對敵臨戎殉節唯死此乃  
國家恒典軍政嚴科臣妄以庸才謬叨重任不能深圖遠  
筭馘醜摧凶以宣廟略之威永息邊人之患屬前軍挫衄  
士卒奔亾臣復繼驅馳戰鬥交合川谷地險客主勢殊步  
馬相懸左右受敵決命爭死力盡塗窮遂以貔貅之師衄  
於犬羊之衆誠宜刎首謝國殺身報恩陛下淇湯禹之仁  
務寬大之典愚臣同孟明之侶遂免嚴誅白骨再榮丹慊

未泯誓將枕戈嘗膽殄逆梟凶躬爲士卒之先以雪殤魂  
之憤肝腦塗地少答鴻私不勝荷戴再生榮幸之至

謝衣表

臣今日日千騎田楷至伏奉恩勅賜臣紫衫旱衫袴等一  
副臣萬死骷骨垂朽蒙榮載戰載殞肝心塗地中謝臣以  
駑朽叨承重任憑奉聖略誅討元凶實合震曜天威俘斬  
逆首而智力淺短進退無規被王孝傑陷鋒于前臣則接  
戰於後躬先士卒苦鬪山林自辰至酉殺賊無數崑谷峻  
狹車乘相旋被孝傑敗兵回相衝突逆賊乘便重襲臣軍

士卒被傷子將多死臣決命爭首陷陣摧兇日暮兵疲瘡  
痍相半鳥散山谷人無鬪心臣獨無依遂失師律卽欲刎  
頸陣下委骨顯誠實恐身死尅傷未雪國恥所以含垢忍  
辱圖死闕庭今月六日至幽州卽囚繫獄戶延頸戢魄惟  
待嚴刑湯鑊在前分委灰土豈謂天慈矜鑒回憲增榮以  
其伏鑕之魂更辱賜衣之寵煩寃踊躍載兢載惶泣血嘗  
膽誓復國讐刻骨刻肌敢忘天造不勝已死再生感戴欣  
躍之至

謝賜冬衣表

臣某言中使某至伏奉某月日勅書慰問將士官吏僧道耆老等并賜臣手詔及冬衣兩副大將等衣一十五副者天慈遠致聖澤傍流海隅臣庶抃舞相慶臣某中謝伏維陛下道宏文武任切藩維遠念戎旅之勤亟頒時節之賜臣以謬膺寄理載涉炎涼効績無聞負敗將及恩私每降慚懼不寧今又俯浹宸慈曲延寵賚當戒寒之初候沐挾纊之殊榮佳氣集於城池喜容生於草木三軍叶慶萬井相歡况臣荷寵逾涯忝恩滋甚螢燭無裨於景曜畎澮徒願於朝宗悚踴遐方感戀俱切無任感恩荷懼屏營之至

爲建安王謝借馬表

臣攸宜言伏奉聖慈勅借臣廩馬四匹星旗方列天馬忽  
來祇拜恩榮抃躍兼集臣名慚白馬陣昧青龍徒憑廟勝  
之威竊總元戎之首皇師久露凶羯未孚方欲親負干戈  
身先士卒金山深入期突厥之功玉壺遂臨叨得駿之賜  
昔開東道今見西來感燕骨而長鳴君恩罔報向朔雲而  
驥首跼頓方擒坐馳千里實愧三軍寵貴非圖榮多增懼

謝藥表

臣某言伏奉中使宣勅旨賜貧道藥總若干味肅恭休命

敬受慚惶猥以眇身叨蒙大賴室殊方丈同問疾之榮施  
等醫王感能仁之惠雖赭鞭神授未可比其英蕤赤斧僊  
圖固以謝其靈氣方將駐茲營魄蠲彼衰痾以要上品之  
經將希大年之壽人微惠重答施何階不勝云云

為宗舍人謝賻贈表

草土臣某頓首稽顙臣言今日日中使某至奉宣勅旨以  
臣母喪贈物若干以給凶事孤臣鞠凶禮辱天貺稽顙拜  
命號絕迷圖中謝孤臣不天早失父蔭兄弟孤藐並未成  
人亾母哀惇鞠育見保不墜於地以及於茲熒熒私門幽

顯爲慶榮忝之望非有始圖陛下親親敦念末屬憫臣孤  
賤惠降恩休孤門載昌實始天造母子之賴以喜以惶喆

兢孤臣未知攸答陛下又恢大運崇號寵章時復私臣弟  
兄超登顯位母子光寵榮養以申豈臣單微所能及此早  
誓先沒以爲親榮而天不禍臣延及先母號愬無及荼毒  
煩寃陛下降哀又見憫悼惠賜禮物過越典章生榮死哀  
重疊若此孤臣殘喘胡顏冒德一作日月而臣之迷塞荒謬禮  
經先遠之期又勞聖問有無之禮憂若家人天實爲之臣  
復何及卽此殞絕期以謝恩號吽崩鯁伏表迷塞不勝荒

金定全唐文 卷二百一  
迫之至

初七謝恩表

草土臣某頓首稽顙言今日日伏奉恩勅以臣父母初七  
特降上宮若干人給使黃門若干人并賜物若干段以給  
護齋事天恩過禮伏念號惶孤臣殃疊尚未殞滅荼毒如  
昨奄將一旬崩號無及肝心糜潰陛下慈惻哀念孤窮復  
憂齋祭恐有闕禮既賜束帛又降上宮恩慈再三若猶未  
足自國家寵貴未聞此榮草茅孤臣何以堪處不日銷滅  
永負聖恩號泣昊天以崩以愬不勝荒迫之至



遷祔謝恩表

草土臣某頓首稽顙言伏奉某月日恩勅以臣亾母遷祔特降勅給人夫及車牛服用物若干以護送靈柩至京祇奉恩私頓首崩殞臣未亾滅假息苦廬日月永往奄及先遠荒迷在疚不知禮儀陛下哀矜憫其不逮恐有顛沛憂及亾靈備物象設並自天賜祖載營送又遣官供威儀在途魂魄光寵行路延佇而以為榮孤臣窮凶何圖至此天德彌厚殘喘待終泣血扶靈方滅歸路號感恩造窮絕迷圖不勝號噓戀恩殞絕

爲僧謝講表

僧某言一昨預內道場講恩勅殊獎賜有袞稱死罪死罪  
某實專蒙昧於至道徒以早栖真實委質香緣遂以濫越  
殊私光照寵渥日者法宮聞道講賜承恩叨玉塵之榮預  
金闈之議遂得對揚真會咫尺天威徒有明恩卒無幽贊  
不能絕王倪之問以默夸詞息毗耶之言冥通得意天休  
光被曲見稱揚羣議允懷猥忘其陋顧揣涯分實覲心顏  
將何翼亮緇徒發揮元極以念嘉惠怵惕惟憂載懷愚瞽  
而心况知愧無任慚荷之至

謝免罪表

臣某言月日司刑少卿郭某奉宣勅旨以臣所犯特從放免伏對恩命魂魄飛揚中謝臣巴蜀微賤名教未聞陛下降非常之恩加不次之命拔臣草野謬齒衣冠臣私門祖宗幽顯榮慶臣一身而已臣宜肅恭名節上答聖

恩不圖誤識凶人坐緣逆黨論臣罪累死有餘辜肝腦塗地不足塞責陛下宏慈育之典寬再宥之刑矜臣草萊憫臣愚昧特恕萬死賜以再生身首獲全已是非分官服具在臣何敢安臣若貪冒寵私醜顏恩造復塵舊職以玷清

金定全厚又 卷二百一  
猷螻蟻微心實慚面目臣伏見西有未賓之虜北有逆命  
之戎尚稽天誅未息邊戍臣請束身塞上奮命賊庭效一  
卒之力答再生之施庶陛下威命綏服荒夷愚臣罪戾時  
補萬一若臣獲死鋒鏑爲厲犬羊古人結草實臣懇願不  
勝大造再生荷戴之至

爲張著作謝父官表

臣某言臣父某守官不謹獲罪自躬犯非清廉法宜不赦  
實由臣爲子不孝使父陷刑天恩不肅嚴科放全首領臣  
得父子相見已是非圖豈謂天澤無涯更垂休命臣父子

兄弟免罪從榮載惶載殞實慶實躍中謝臣父子凡品守  
道幽微天恩矜憫見垂采錄叨承恩幸側列陪臣自侍奉  
已來於今十有八載雖業藝無紀勞勩不聞小心恭勤實  
免愆過明明昊天實昭實察不敢有二不敢有私夙夜兢  
兢祇惕若厲所以父母兄弟皆荷恩私叨職謬官並豫供  
奉摩頂至趾豈足上酬愚臣兢兢實慚實悚不意臣父衰  
耄恃寵忘公貪潤微財取犯朝憲應是臣不忠不孝事父  
無良廉恥不羞幾諫有闕遂使陷於刑法有玷國章臣之  
萬死無補此責刻肌刻骨泣血泣天恨負聖恩以媿朝列

金定全唐文 卷二百一  
臣宜代父蒙罪自殞闕庭不合偷安尚求苟免誠以天波  
昭洗得更自新所以忍垢偷生尅躬自勵期効萬一補過  
酬恩灰軀糜骨以甘心願伏惟神皇陛下恩同父母矜照  
懇誠信其赤心實有罄竭

爲王美暢謝兄官表

臣某言臣兄某前某官特蒙恩詔擢授豫州司馬未及赴  
任卽以某月日改亳州司馬再三策命叨荷恩私在臣宗  
門實爲慶幸中謝臣兄自解巾從仕三十餘年五爲縣宰  
三遷州佐政皆通顯職實恭勤直道在公有終始之節平

心應物無造次之憊在於周行頗蒙推薦近屬虺貞構逆  
惑亂豫州註誤平人自貽梟滅陛下憫荆河之俗遭此無  
辜弔汝瀆之人使其昭慶以爲奉揚皇化者必藉其才撫  
馭窮人者亦資有德臣兄貞固濫承天獎遷授豫州在於  
天恩實爲超擢今者未及赴任復降授亳州重疊承恩翻  
同貶降朝廷體例實亦爲尤臣兄弟叨榮濫竊非據天慈  
改授不合冒聞但以始者承恩蒙越抽擢今有何過遂同  
左遷區區懇誠輒敢祈訴天澤伏願皇慈有裕降昭獎之  
恩臣兄竭忠獲展才之地小臣死日猶生之年

爲武奉御謝官表

臣某言伏奉某月日詔書以臣爲尚食奉御肅恭休命祇  
拜寵章榮慶旣崇慚荷交集臣某中謝臣才虧琢玉學昧  
籛金徒以席寵葭莩榮光日月叨承雲渥旣曠天工而榮  
更恩昇位非德舉無階而進坐致於青霄有慶方來載光  
於朱紱臣聞瑶庭任切猶稱六尚之榮玉食禮尊實總八  
珍之貴臣術慚緣鶴業匪豢龍將何致美瓊芳式和金鼎  
宏私曲被殊寵降臨天命旣不可違聖恩允宜祇戴循涯  
揣分實所非圖



爲百官謝追尊魏國大王表

臣等昨陳愚懇請上魏國大王尊號天慈恩孝降順羣情  
宇宙咸歡品物知泰云云臣聞一人有慶萬國歡心况乎  
道洽奉先義光尊號伏惟聖母神皇陛下鑣宮受命寶極  
披圖以大孝而居尊勤至仁而育物用能光於四海化及  
萬方緬惟尊祖之儀實美前王之典宸心載穆盛百辟之  
誠求帝冊終開見千年之盛禮蒼旻以之禔福皇極由其  
永昌凡在含靈孰不歡慶

爲司農李卿讓本官表

臣某言伏奉月日恩制依舊授臣中大夫守司農卿臣枯骨再生更蒙寵命魂魄競越不知所圖臣某中謝臣實庸愚本無名節庇身公族竊軒冕之餘假翼宗枝濫衣冠之末因循寵服累歷榮班素飡之責每深効拙之勤未補橫被逆賊徐敬真以私讐架禍誣臣云與叔孝逸交通逆豎獄官執法寘以極刑臣腰領之誅已甘灰粉泉壤之魄分隔幽冥不圖天地之恩再生枯骨日月之照曲被幽泉察臣非辜愆臣無罪不牽文法之議特垂赦宥之慈螻蟻微軀復得全活自非陛下克明克聖至德至仁臣之魂骸不

保今日臣免死爲幸豈敢期榮陛下重加寵章還臣舊職  
典司宗伯以睦周親愚臣胡顏敢冒朝典况臣叔孝逸推  
使未迴在於臣愚更深待罪安敢私一作職以玷國章伏  
乞天恩照臣愚懇不勝感戴生榮之至云云

爲陳舍人讓官表

臣某言伏奉今日詔書以臣爲鳳閣舍人榮命自天寵  
章非次祇奉惶越顛沛失圖中謝臣以諸生宦不期達徒  
以時逢昭泰迹忝周行非有君子瑚璉之材通儒青紫之  
秀已得評刑北寺執憲南臺鸚鳩之政無聞驄馬之榮已

極陛下天飛踐祚雲紀命官陽館初開庶政惟始金章玉  
式允恃其人如臣疲駑宜所遐棄豈圖尚矜庸劣昭覩欽  
明任同信臣寵優時輩豫參詳於詔獄叨獎渥於宸階省  
已循躬實知非分陛下不以榮過其量職越其才遂欲超  
絕親賢參掌樞要司言鳳綽揮翰龍池愚臣何人敢冒天  
造臣聞紫機務重青鎖任隆位匪其人政由有闕臣才無  
經濟識昧典章將何以光贊帝猷奉揚休命物無異議政  
允其中臣雖小人必知不可何況乎君子豈曰能賢伏望  
妙選時英苟求衆議僉曰惟允以弼良圖愚臣懇誠非敢

飾讓

爲司刑袁卿讓官表

臣某言伏奉某月日勅授臣某官祇拜寵光魂首飛越中謝臣聞王者敬慎懋在典刑天下允平取茲廷尉苟非其任法不虛行臣本庸微名術無紀皆緣際會昭遇盛明謬得揚厯簪微陪奉鴛鷺綢繆榮祿荏苒平時毫髮之功無聞於官守素飡之責每積於公朝何嘗不悚迫惟憂夙夜祇畏而天恩方被寵命仍加復蒙璽誥之榮驟綰銀章之貴永言非據稽首知慚伏惟陛下恭已受圖任賢興化方

其合符皇極代理天工臣亦何人敢妨賢路伏見某官弱冠登仕早有能名每以清白洗心不爲寒溫變節誠使榮加天寵職察雲司必能利用文明哀矜庶獄弼成五教無謝於虞臣典載三墳允諧於周議愚臣暗昧不識大猷請乞以所授官讓與某官庶使官允其才名不失實聖明有得人之盛愚臣無冒貴之譏實在聖慈鑒非虛謬

爲資州鄭使君讓官表

臣某言伏奉月日制以臣爲資州刺史恭承璽命祇拜寵章匪服知慚循榮如失中謝臣學慚名術才乏器能而寶

歷逢時金章坐忝題輿佐嶽無展驥之庸剖竹專城闕懸  
魚之化坐嘯徒積主諾空慚伏惟陛下革命開基造天立  
極方且宏宣帝典大啓皇猷而四岳觀風不虛其任六條  
班政允屬其才臣疲朽已侵循良久昧將何式光刺舉允  
協得人伏願博選英才克諧僉議使人光理政洽惟良大  
周之命惟新愚臣之責攸息其所讓人具如別狀

爲金吾將軍陳令英請免官表

臣某頓首死罪上言臣聞軍政不臧春秋責帥故揚干之  
亂魏絳致戮所以國有明賞下無濫功臣幸以常才文武

兼闕始年十八投筆從戎西踰流沙東絕滄海南征北伐  
無所不至席寵門緒忝迹軒墀屬高宗崇德深仁孝理天

下以臣祖父

一作父子

兄弟一門五人皆伏節盡忠身死王事

遂超臣不次授原州都督臣時年三十二

一作四十二

職兼五

印榮絕一時階緣此恩累忝藩翰持節統部前後八州皆

居塞垣當賊衝要國之重寄莫與臣比雖無長策卹戎伏

胡恭守朝章保完免失屬陛下大聖矜老容愚不以臣駑

怯更加寵命授以青紫遣督幽州林胡搆凶王師出討士

馬雲集軍務星繁糧饋軍甲動以億計臣無田疇鄉導之



策又乏杜預度支之才空竭疲駑晝夜不息以勤補拙首

尾三

一作

年彌縫闕漏幸無憊乏張元遇等不謹師律賊

得乘機遂敢長驅燕陞深入趙際臣又無李牧東胡之略  
實媿吳起西河之守使凶狡斂歎遂擾邊鄙論之國憲合

刎頸謝罪陛下又不以臣爲辜更授清邊軍副大總管五  
月恩制六月到軍逆虜天亾臣又無効至於軍功戰籍敘  
勲定勞副職日淺未及精覆大兵旋旆王師獻功而漢庭  
將軍未聞辭第雲中太守已論增級今乃竊功謬賞有忝  
朝章忠誠殉節不昭國議實由臣濫其職任過其才上不

能允副聖心中不能匡正戎律徬招物議有紊軍容臣罪  
何逃孰執其咎伏願乞賜骸骨貶歸私第式清朝序永覩  
師貞不勝待罪惶懼之至